

**Monday, February 23, 2026**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

### **HAND HOLDING SCHEME**

Chief Minister Pu Lalduhoma'n sorkarin Mizoram Bana Kaih (Handholding) Scheme, 2024 hnuaiia loan hmu tura a thlan tawhte chu Bank-in hnawl tura thuneihna a nei lo tih a sawi.

Assembly Budget Session neih mekah East Tuipui bialtu MLA Pu Ramthanmawia'n Hand Holding Scheme hnuaiia loan diltute Sorkar in Guarantorah a tan sak hlawn em tih a zawhna ziaka chhangin Planning & Programme Implementation Department changtu, Minister Pu Lalduhoma chuan The Mizoram Bana Kaih (Handholding) Scheme, 2024 hnuaiia loan diltute chu The Mizoram Credit Guarantee Fund Scheme for Micro and Small Enterprises (MzCGTMSE), 2024- in a huam chinah guarantor leh dahkham ngai lovin loan pek an ni a ti a. Sorkarin Mizoram Bana Kaih (Handholding) Scheme, 2024 hnuaiia loan hmu tura a thlan tawhte chu Bank-in hnawl tura thuneihna a nei lo tih sawiin, Loan dilna leh loan diltu chungchangah Bank lamin loan pek theih a nih loh chhan tur an hriat chuan Mizoram State Policy Coordination Committee (MSPCC) ah an thlen thei a. MSPCC (Apex Body) chuan uluk taka ngaihtuahin loan pek a nih loh chhan tur thu tlinga a ngaihte chu a chhan mumal taka ziakin Department hnenah reject turin a hriattir thin. Chhan mumal tawk lo leh project (DPR) her rem ngai a nih chuan Department leh Progress Partner-ten siamtha in Bank-ah pek leh thin anih thu a tarlang a ni.



### **HOME MINISTER**

Home Minister Pu K Sapdanga'n Mizoram police hnuaiia post ruak battalion li daih awm mek chu Mizoram sorkar sumin a phalsak loh avangin an hnawhkhat thei lo tih a sawi.

He thu hi vawiin Assembly budget session zawhna leh chhanna hunah sawiin Home Minister Pu K Sapdanga chuan, Police an indaih lo hle a ti a, tun dinhmunah Mizoram police hnuaiia post ruak battalion li daih a awm mek a, police post ruak te hnawh khat turin state fund in a phalsak chiah lo tih a sawi a ni.

### ***Byte : Home Minister***

Home Minister chuan ram pum a police quarter, police station, outpost, leh beat post ah te an building chu an tlakbalna lai ber a ni tih an hriat thu a sawi a, PHQ atangin ram pum survey an nei tawh a, mamawh zualna hriat chian ni tawhin, engtingge an thuan ang tih an ngaihtuah mek a ti a. Tunhnaia central fund an dawn chu khawpui bakah ram pilril leh hmun kilkhawr zawka Police tih chakna atan hman an tum tih a sawi a. Hei bakah hian Minister chuan police station hrang hrangah motor an inpe mek zel a, police station leh police outpost te a thahnem avangin a indaih motor ruahman a la har rih tih a sawi bawk a ni.



## **TB**

Siaha District-a Tuberculosis (TB) Centre ah TB vei mi 80 enkawl mek an ni.

Siaha District TB Centre-a thawktute chhinchhiah danin nikum 2025 khan TB vei 142 pahnih hmuchhuah niin, kumin 2026 hian TB natna vei mi 12 hmuchhuah tawh a ni a, Heng zinga mi 80 hian a hun taka enkawl na an la chhunzawm zel tih chhinchhiah a ni.

Hetih mek lai hian, Nikhshay Mitra hnuaia TB vei te hnena ei leh hrisel tha pekchhuah thin a ni a, Nikhshay Mitra kaltlang hian Siaha District TB centre tan mi 12 in tanpuina an pe tawh a, TB vei mi 30 hnena ei leh in tha pek chhuah tawh a ni bawk.



## **ASSEMBLY-MUHCS**

Mizoram sorkar chuan tun thla February ni 3 thleng khan MUHCS hnuaia Non Empanelled Hospital a damlo refer-te Bill cheng vbc 25, nuai 11, sing 5, sang 2, leh 17 a ba.

Health Minister Pi Lalrinpui chuan Assembly thutkhawmah ziaka zawhna chhangin kumin February ni 3 thleng khan Mizoram sorkar chuan MUHCS hnuaia Non Empanelled Hospital a damlo refer- mi sang 2, 837 te Bill cheng vbc 25, nuai 11, sing 5, sang 2, leh 17 a ba tih a sawi a, Mizorama private damdawi in zinga MUHCS empanelled la ni lo te inrem tumin an inbe mek tih a tarlang a.

Tun dinhmunah Mizoram chhunga mimal enkawl Damdawi in 16 - JC Eye Hospital, Aizawl, Nazareth Hospital, Chaltlang, Aizawl, Nazareth Hospital, Ramhlun North, Aizawl, Redeem Hospital, College Veng, Aizawl, Synod Hospital, Durtlang, Aizawl, BN Hospital & Research Centre, Kulikawn, Aizawl, Eye Care Hospital, Dawrpui, Aizawl, Champhai D.M. Hospital, Champhai, MED-AIM Hospital, Champhai, Christian Hospital, Lawngtlai, Lawngtlai Lairam Christian Medical Centre (LCMC), Lawngtlai, Christian Hospital, Serkawn, Lunglei, Faith Hospital, Lunglei, John Williams Hospital, Lunglei, Serchhip Mercy Hospital, Serchhip leh Maraland Gospel Centenary Hospital (MGC), Siaha te bakah Day Care Centre pathum- Kidney 360° Superspeciality Clinic and Dialysis Centre, Bazar Bungkawn, Aizawl, Rapha Day Care Centre, Zarkawt, Aizawl leh Vohbik Day Care, Salem Veng, Aizawl te an ni.

Mizoram pawna private hospital 33 awm bawkin chungte chu Silchar, West Bengal khawpui pakhat Barasat, Ghaziabad, Mumbai, Gurugram, Lucknow, Ranchi, Indore, leh Patna-ah te damdawi in pakhat theuh, Noida-ah damdawi in 2, Guwahati-ah damdawi in 4, New Delhi-ah damdawi in 8 leh Kolkata-ah damdawi in 10 te an ni.



## **AI IMPACT SUMMIT**

Prime Minister Narendra Modi-a'n India AI Impact Summit chu hmalam huna khawvelin AI thiltihtheihna a chhawr tangkai dan tur tarlanna a ni, a ti. Nimina Akashvani-a Mann Ki Baat hun a hmanna-ah he thu hi sawiin ram hrang hrang

hruaitute, industry lam hotu pawimawhte, thil siam chhuak mite leh Start-Up sector kalpuitute, AI Impact Summit-a tel tur hian New Delhi-a Bharat Mandapam-ah an rawn fuan khawm a ni, a ti a, AI lama India-in theihna sang tak a neih zia, khawvelin a hmuh phah tih sawiin Summit neih hun chhung hian India-in Made in India AI Model pathum a tlangzarh a ti bawk.



## **INDIA CONDEMN PAK AIRSTRIKE**

India chuan Aghanistan ramchhung Pakistan thlawhnaten an kap chu a dem thu a sawi. External Affairs Ministry thupuangtu Randhir Jaiswal chuan hemi chungchanga chanchinbumite zawhna chhangin Pakistan-in a tualchhung buaina rampawna benper a tumna pakhat anih thu a sawi a. Muslim te thlaserh Ramadan laia hetiang sipai thlawhna hmanga Afghan ramchhung an bei chu a demawm a tih thu sawiin civil mi engemawzatin hliam an tuar a ti a. An zingah hian hmeichhia leh naupang an tel a ti a. India chuan Afghanistan-in mahnia ro inrel tura zalenna a neih chu a thlawp tlat tih a sawi bawk a ni.

